# 16.09.2021 **№ 18** (1252)

www.khanty-yasang.ru

Основана 11 февраля 1989 года

E-mail:gazeta@khanty-yasang.ru



Ты хурит Москва ўсн «Сокровища Севера» суссылтапын ялум кўщаит, мащтыр ос эргынййквнэ махум послым олэгыт. Округув ёмас выставкатэ Гран-При магсыл щар яныг муйлупсал майвес. Ты урыл 10-11 лопсыгт ловиньтэн.

Ты номерт ловиньтэ̀н:	Сōрни оспа таквсы пора ▶ 2	Няврамаквет сотыныг вос олэгыт 4	Наманув акв н∋пакн хансавет ▶ 5
Сосса миранув	Ма̀ньщи ма́т наманыл нэ̀пакн хансыс ▶ 12	Лōпмус пāвыл колтāгыл ▶ 13	Мӯтран



### Сорни оспа таквсы пора

Регын туи пора ювле та хультыс, ань сорни оспа таквсы пора ёхтыс. Кон мощ ащирманнувег ёмтыс, тованакт раквсам пасги манос хотты мат хотал палыт раквункве вёрми. Луптан ййвыт хорамын луптаныл ёл-патыглантэгыт, вор янытэт такем хорамыныг ёмтэгыт. Тувле нупыл сунсым нас щагтэгын.

Ос таквсыг махманув сав рупата оньщегыт, туи сыс тэпкант янмалтан тэнутаныл хот-выганыл, ворн пил ватункве ос пакв атункве ялапалэгыт. Тох хоса тэлы кастыл сопас варегыт. Тувыл тэпкананылт мансавит овощит ос пил ватсыт, таияныл тэнутыт пайтсыт, хоты овощит мак щирыл янмалтанкве эри, та урыл нэт танки халанылт потыртэгыт. Ос ўсын манос павлын мат касылыт олыглан порат варум рўпатаныл суссылтыяныл.

Ты накт Белоярский ўс намхоталэ янытлан магыс савсыр мероприятият варыглавесыт. Акв касыл «Дары осени» намаим олыс, тот Белоярский районт «Югралылыеп» ассоциацият пунктотнэ нэ, Ирина Фирсова, сосса махум касункве вовыгласанэ. Мань павылт олнэ хотпат ищхипын ут хосыт касункве вермысыт. Тан танки пайтум тэнутаныл

«рецептыт» хассыт ос хурин послым касылын кетсаныл.

Ань Белоярскийт «Нуви-Ат» сав мирыт акван-атхатанэ колт «Дары осени» ярмарка рўпитас. Махум танки янмалтан тэнутаныл суссылтасыт остыналасыт. Тонт касылыт каснэ хотпат пуссын яныг пўмащипа латныл лаввёсыт ос грамотанэпакытыл майвёсыт.

Тох ищхйпын ут хосыт суссылтам ос «рецепт» потраныл магыс **«Пилыт** ос овощит» нампа номинацият Пашторы павылт олнэ **Татьяна Кирилло**вна Лельхова ос Вера Терентьевна Данилова эсгувесыг. Татьяна Лельхова ревень ос свекла овощнил атын тэнут варыс ос ты урыл потыр хансыс, хумус вараве. Вера Данилова хумус овощит тэлы порат ёмщакв уральтым оньщавет, ты вармалит овылтыт потыртас.



Нэлли Григорьевна Пичерская ос Валентина Дмитриевна Ирган Ванзеватныл блнэ нэг ос Зоя Никоновна Тарлина Касумныл «Осенняя фантазия» номинацият янытлавёсыт. Валентина Ирган кабачок овощныл щанька-нянь варнэ урыл хансыс. Зоя Тарлина сосныл щай пайтыс, сыресыр луптал хорамын суссылтап варыс.

Ванзеват павылт олнэ нэ Руфина Прокопьевна Гришкина «Осенняя композиция» номинацият эсгувес. Нэ такви колэ похат подсолнух луптат янмалтам. «Всей семьей на даче» намаим тэлат

Надежда Алексеевна Гришкина янытлавес. Тав Тугияны павылт олы, щёмьятэ ёт акваг пил ватэгыт, картёпка янмалтэгыт ос ўйхуланыл магыс пум сагрегыт.

Полноват павылт олнэ нэ Людмила Николаевна Костина хорамын луптат акваг янмалты. Савсыр луптал тав хорам вари ос хотьютын муйлупты, тох махумн щагт вари. Тав ань «Цветы на даче» номинацият эсгувес.

Ань тэлы кастыл пайтым тэнутыл махманув маткем та олэгыт тах.









### Павылкан ос нэпак ощнэ кол йильпииг щёпитавесыг

ты этпос овыл хоталанэт Белоярский район кущай ойка Сергей Маненков Касум павылн ялыс. Тот павылкан ос Мария Кузьминична Волдина нампа нэпак ощнэ кол йильпииг щёпитавесыг.

Сергей Петрович «ВКонтакте» нампа ищхйпын лопсэт Касум павылкан урыл тох хансыс:

– Ты тэла Югра мат щёпитым проектыт хосыт варвес. Павылканэ ань татем яныг, нётнэ. Махум тыт ань нявраманыл ёт ёмыгтанкве, ўщлахтункве вермегыт. Матыр ялпын хоталыт варегыт те, пуссын тот муйлункве патэгыт. Найпосыт варвесыт, сыре-сыр хоса уласыт унттувесыт. Пормасыт пуссын ханты хорамытыл щуртгалавесыт, послувесыт.

Сергей Маненков Касум павыл кущай нэн Алсу Хасимовна Назырован диплом нэпак мис, лавыс, ты янытлан нэпакыл тан округ губернатор Наталья Комарован кетвесыт. Павланыл Югра янытыл олум «Лучшая муниципальная практика» нампа Всероссийский конкурс «Укрепление межнационального мира и согласия» номинациятэт нох-патыс.

Тувыл кущай ойка Григорий Петрович Каневын грамота-нэпак мис. Ты ойка сав тал рупитас, район магыс яныг парыс тотыс, яныгхотпа ань



таимагыс ты янытлаве.

Тувыл махум Мария Кузьминична Волдина нампа нэпак ошнэ колн ялсыт, ты тал кол 89 талэ товлыс. **«Культурное пространство»** государственный программа щирыл тав йильпииг щёпитавес, тув сав ищхипын утыт, пасаныт, уласыт ос мот эрнэ пормасыт ёвтвёсыт. Тот ань нэпак ловиньтанкве рови, ўнлахолункве, потраманкве-мойтункве ос савсыр ханищтапыт варыгланкве вермегыт.

Мӯй махум магыс

**«Родное слово»** кружокн ялантан хотпат пумыщ концерт суссылтасыт.

Сергей Петрович ты библиотека кол кущай нэквён Светлана Ивановна Рандымован 50 сотыра сертификат-олн мис, лави, нэпак ощнэ кол магыс эрнэ матыр вос ёвтэгыт. Хум павыл мир янытласанэ, сав ёмас, сымын латын тананылн лавыс.

Надежда Рагимова потре маньщи латныг Светлана РОМБАНДЕЕВА

толмашластэ

### Мань няврамыт янмалтан кол

ўкыр этпос 1 хоталэт 2021 тал Октябрьский район Нягань ўст сака мань няврамыт магыс ясли рўпитанкве овылтахтас. «Сказка» нампа няврамыт садикт янас колнак щёпитавес, намаявес «Кроха». Тув ань кит этпосыл яныгнув няврамыт тотыглавет.

Тамле мань няврамыт ёт рупитан магыс, воспитателит янас программа хосыт ханищтавесыт. Ань ваганыл, хумус тананыл ургаланкве эри.

«Сказка» садик кўщай нэ Нина Линник лавыс, колнаканылт эрнэ матыр пуссын олы: уласыт, няврам манигтан ос перга-

тāлнэ пасан, тыттын мāгыс уласыт, сāвсыр ёнгилыт.

Ты ясли варункве садикт рўпитан нэквет номылматсыт. Тан нявраманыл ёт юн олсыт, акваг лавсасыт, рўпитанкве тахнувыт кос, ос кояныл ин манит. Тувыл каркам омат эрнэ нэпакыт щёпитасыт, грант-

олн винэ ман кётсаныл. Тэланыл нох-патыс, ясли варнэ магыс 550 сотыра солковил кётвёсыт. Та олнытыл ясли колнак ты щёпитасыт.

Няганьт олнэ махум мань нявраманыл яслин минкве сака ат тахнэныл, нас садикн тай тотыглыяныл. Ты тэла ущ варвес, това ат хулыгластэ ясли урыл, хотьют касащи, нявраме тув тах хансытэ.

Нягань ўст ханищтап ос наука комитет палт пунктотнэ хотпа Ирина Ерофеева лавыс, ань колын садикн 133 няврам яланты. Нягань ўст тамле

кит кол блы. Ўс янытыл аквхуйплов садик рў-питы, нила колнакытнакв тал ос хот этпос товлын няврамыт тотыглавет, сайтхуйплов колнакн кит талныл ос хўрум тал яныт агирищит-пыгрищит ялантэгыт. Места тал нэмхотьют ат хультыс. Няврамыт ань «Кроха» яслин ўравет, тынакт тув мань Тимур, Даша ос Дарий тотыглавет.

Ирина Самсонова потре маньщи латныг Светлана МАТВЕЕВА толмащластэ





# Няврамаквет сотыныг вос олэгыт

савсыр ляххалыт ань ос

такви фонд-колэ урыл

тох лāвыс: «Мāн фондув

13 тал рупиты. Та сыс

ман акван-юрщхатым

ос акван-нётхатым ёмас

олнэ хотал касын ще-

мьятн кинсэв. Ман сав

няврамын щёмьятын

нётэв, няврамаквет пус-

тāгыл вос янмалтавēсыт,

нэмат тарвит ос нуса ул

тэлат кастыл ман 2027

тал мус эрнэ программа

хассув, таит макыг варнэв

Тувыл демография

вос васыт.

Марина Гордеева

тот ловиньтанкве рови.

ы накт Сургут ўст ос районэт Россия сав маныл акван-атхатыглан форум олыс. Рущ щирыл тав «Вместе – ради детей» намаим олы, ос тамле нак XII щёс варыглавес. Касынъемт тот няврамыт палт тарвитыг олыглам савсыр тэлат тарапаттыглавет, ос тананыл щёпитан магыс аквъёт номсахтэгыт.

Тамле ханищтап Москва палыл варыглавес, няврамыт тарвит олупсан ликмегыт ке ос тот тананыл нётнэ Фонд-кол олы. Пуссын ты тэлат хосыт Марина Владимировна Гордеева пунктоты. Ос касын российский субъектыт мирн нётмил варнэ департаментыт тан ётаныл юрщхатым рўпитэгыт.

Ань ты тал Юграт акван-хонтхатыглам наканыл тан «Новые решения для благополучия детей» намтысаныл. Таимагыс Сургут ўсн Россия янытыл 65 савсыр маныл ос 42 миркол ўсытныл муй хотпат ёхталасыт. Няврамаквет пустагыл ос щуниныг олнэныл кастыл тан сыре-сыр тэлат овылтыт вортур этпос 7 хоталныл ос 10 хоталэ мус рупитасыт.

Нила хоталыт сыс варум рупатаныл мот махум ищхйпын ут хосыт сунсункве вёрмысыт. Махум потыртан магыс ёнта пасан ватан акванатхатыглалсыт, пуссын тарвит вармалит тарапаттысаныл. Това кущаит Сургут ўст агмың-мосын ос сакватахтам хотпат <u> </u>ощнэ центрын тотыглавёсыт ос та махум ёт

район Барсово павылт «Инновации – детям» нампа мащтырлан щёсыл

вайхатасыт. Манхурип пусмалтан ищхйпын утыл ёвтвёсыт ос хумус пусмалтавет, таи суссыт. Тувыл Сургутский

щёпиталвесыт. Тот элын олнэ щёмьят манхурип нётмилыл варавет ос **овылн** патум няврамыт олупсаныл урыл потыртасыт. Сосса махум щемьят **о**лупсаныл Русскинский павылныл «Этноград» нампа колныл суссылтавёсыт.

Ты форумт олыглам ханищтапыт касың хотпа www.forum-detyam.ru. ищхйпын лопсыт хонтункве вёрмыс. Тувыл

магыс пуссын аквъёт рупитанкве патэв».

Округт мирн нётмил варнэ департамент-колт рўпитан кўщай нэ Тереза Пономарёва лавыс, Югра янытыл агмың-мосың ос сакватахтам хотпат магыс нёлолов центрыт ōлэгыт. Ань тан ётаныл рўпитан магыс йильпи проект хассыт ос сукыр этпосныл тав щирётыл рўпитанкве патсыт. Тамле агмың элумхолас ёт тан

самын патнэ пасыл ос атимыг ёмтнэ мус акваг тананыл уральтым ос пусмалтым оньщункве патыяныл. Та щирыл тан аквтох ОВЗ яныг хотпат ёт ос рупитэгыт. Ты коныпал матыр-ати варункве тананыл ханищтыяныл ос ётыл хот рупатал кинсавет.

Югра мав мот мир элыпалт мощ эсгувес, тыт касын тал сав няврам самын паты, сав няврамың щёмьят тыт олэгыт. Тувыл аутизм агм ощнэ няврамыт ос агмынмосын, сакватахтам хотпат ёмщакв пусмалтым оньщавет. Няврамыт ёт потыртан «телефон доверия» рупиты, тан та хосыт ёмщакв олнэ накыл хултавет.

Ос юи-бвыл хоталыт Россия янытыл рупитан тамле 38 колыт дипломыл муйлуптавесыт. Тот 26 савсыр номинацият халт округув «Выбираю успех!», «В кругу семьи!», «Мастер доверия», «Лучшее IT решение» ос «Лидер выставочных коммуникаций» лаввес. Тувыл «Fashion ШОУ» акв проект нох-патыс, тот Елена Скакун, Андрей Каширин ос Алена Немчинова агмың-мосың ос сакватахмат хотпат магыс хорамың маснутыт юнтсыт ос тананылн ты маснутыт мастым мирн суссылтасаныл. Супанылт сосса махум хансат ос округув савсыр брендлатныт олэгыт.

Тамара МЕРОВА



### Наманув акв нэпакн хансавет



Хурит ўст блнэ сосса нэквет послым олэгыт: Л. Гурьева, М. Макарова, И. Самсонова, Н. Рагимова ос С. Ромбандеева

Россиявт олнэ мощщаг хультум сосса мирыт эрнэ нэпаканыл Москва ўсн Федеральный агентство по делам национальностей колн акван-атнэ овылтыт ман «Луима сэрипос» газетавт хансыгласув. Ты тэла 2021 тал янк натнэ этпосэт овылтавес ос 2023 тал мус варункве патаве. Эрнэ нэпакыт МФЦ (Многофункциональный центр) колт пирмайтавет.

Ты этпос 3 хоталэт Ханты-Мансийск ўс МФЦ колн ўст олнэ сосса махум акван-атыглавесыт. Ты хонтхатыглап тох намаялвес: «Впиши себя в Реестр коренных народов!» Ўст олнэ «Югралылыеп» организацият рўпитан каркам нэквет махманув тан ты тув вовиньталсаныл, ань манти маньщи супанув нох вос масыянув, эрнэ нэпаканув ёт вос выганув.

Тув ёхтысув, нэпаканув суссылтасанув, заявление-нэпак хассув. Ляххал тотнэ хотпатн кинан послувесув, лавегыт, элын олнэ махманувн вос касалавев, хумус ман тыт нэпаканув эл-кетыянув. Тан ос тах МФЦ колн вос ялэгыт, наманыл акв нэпакын хаснэ магыс эрнэ документаныл вос суссылтыяныл.

Та хотал тув ты матт



рупитан сосса хотпанув ялсыт – «Югра лылыёп» организация, «Ханты ясан» ос «Луима сэрипос» газетаг варнэ хотпат, «Лылын союм» колт няврам ханищтан махум, «Хотал» («Солнце») театр, Ас-угорский институт, ЮГУ колт ханищтан хотпат. Эрнэ нэпаканув тот сусвёсыт, пирмайтавёсыт, тувыл элаль тах Россия сосса мирыт

Ханты нэ Людмила Гурьева
Тувыл тан ос нэпаканыл акван вос атыяныл, МФЦ колн вос тотыяныл. Хунь наманыл реестрын хансавет, тах хул алыщлан манос вораян магыс квотанэпакыл минкве патавет. Ам рут махманум пес тагыл хул алыщлэгыт, ам ос хул алыщланувум, ос кущаит лавегыт, уст олнэ сосса хотпат квотал ат мивет, туп мань павлытт олнэ махманув нётавет.



Маньщи хум Василий Мехнин

реестр-нэпакын аквантулнэ магыс кётавет.

«Ханты ясан» газетат рўпитан ханты нэ **Людмила Гурьева** тох лавыс:

– Ман, ляххал тотнэ махум, тыг таимагыс ёхтысув, элын олнэ сосса махманув телевизор хосыт вос сунсэгыт, ман ань тыт хумус эрнэ нэпаканув Москван кетыянув.

Федеральный агентстват рупитан кущаит нупыл ты урыл сав щёс потырталсув. Тан ювле лавсыт, хунь сосса мирыт наманыл пуссын акв реестр нэпакын хансавет, тонт тах ущ эрнэ тэлат сакконыг щёпитанкве вёрмияныл.

Ты, атхунь, сака эрнэ яныг тэла. Ман, округт олнэ сосса мирыт маньщи, ханты ос ёрн махум, наманув Россият **ОЛНЭ МОЩЩАГ ХУЛЬТУМ** мирыт халн хансавет. Тонт тах тара-паты, Юграт манос мот мат мансавит маньщи хотпанув олэгыт. Тувыл кўщаит ванкве патэгыт, хотьютн нётункве эри, щань латын ханищтан ос культура нох-вормалтан магыс манах солкови тастункве эри.

Нас пох хотпа наме реестр нэпакн ат хансаве. Касын хотпа эрнэ нэпаканэ щирыл нанки, тав аман соль маньщи, эвенк манос ёрн хотпа. Та яныг нэпак капайн туп мак маньщи элумхоласатёнув наманыл тулавет.

Тамле тэла акваг хунь вараве, сав тал ювле хульты, тах махум ванкве патэгыт, ань ты 2021 талт Россия янытыл манах сосса хотпа олсыт-хулсыт.

Светлана РОМБАНДЕЕВА



## Вах я ватат олнэ ханты мир

В ортур этпос 27 хоталэт Ханты-Мансийск ўст «Торум Маа» музейт «По следам этнографической экспедиции по реке Вах» суссылтап рўпитанкве овылтахтас. Музейт тамле тэлат ватихал щёпиталавет, тан пуссын «От экспедиции к экспозиции» вармаль палт тўлым олэгыт.

Музей кущай ванн хотпа **Ирина Ксенофонтова** лавыс:

– Экспедиция тэла музейн сака яныг парыс тоты. Хунь тыт рупитан хотпанув хотталь ялэгыт, ювле сав эрнэ пормас тотэгыт. 2019 талт округ культура департамент колныл нётмил хосыт исследователиг олнэ хотпат Вах я нупыл экспедициян ялсыт, сосса мир *олупса тара-паттысыт, ма*витаныл уральтасаныл. Та мāт Томский университет этнограф учёный хōтпаг Надежда Васильевна Лукина ос Владислав Михайлович Кулемзин сав тал яласасыг, ханты мир олупсаныл ханищтасыг, потраныл ёлхассыг.Тан оста мат олсыт.

Ты тэла палт «Торум Маа» музейт рупитан нэ **Дарья Кунина** пунктотыс, тав тох потыртас:

– Ам хунь *ōвыл* щёс Корлики пāвылн ялсум, тот ваховский ханты махум ёт вайхатасум, суссум, хумус тан щаквщегыт – сасныл сыре-сыр хусапсовыт ос анысаныт варсыт, совныл маснут юнтсыт, маньхапыт варсыт. Тонт номылматсум, татем мащтыр элум-холасаквет тыт олэгыт, пёс тэланыл ханищтанкве эри.

Тувыл 2019 талт тан кит щёс та махум палт ялсыт, сукыр ос ват саграпнал этпост. Дарья Кунина лавыс, сукыр этпост тан мащтыр махум ёт сасныл хусапсовыт юнтсыт. Пормасыт хумус варункве эри, хурит хумус йинункве ос яктункве, пуссын ёл-хассаныл, послысаныл.

Ват саграпнал этпост ос салы ўрнэ махум палт ялсыт. Тот суссыт, салы сов хумус тынтлаве, йинаве. Мащтыр нэт маныр юнтэгыт, хумус щаквщёгыт, та маныр, пуссын кинан послысаныл.

Вах я вата хосыт олнэ



Вах я ватат ўнлын кол



Дарья Кунина потырты

хўрум колтагыл палт холгласыт: Анатолий Петрович, Алексей Фёдорович ос Лидия Нестеровна Каткалевыт. Тувыл элаль ханты махум олнэ стойбищат мус ялсыт – Андрей Ильич ос Василий Гаврилович Куниныг, ос Дмитрий Владимирович Прасин колтаглыт. Тан ос пуссын Вах яляпат олэгыт.

Дарья Кунина лавыс, махум тот пёс йис щирыл щаквщёгыт, маснутаныл, анысананыл манос алыщлапаныл ань тыхотал мус пёс щирыл варияныл.

Вах я ватат олнэ ханты махум Томск ўс университет учёный хотпаг Надежда Васильевна Лукина ос Владислав Михайлович Кулемзинёмас номтыл номылматыглыяныл. Лавнэныл, матъёмас тан олнэ мананылн ёхталасыг, олуп-

саныл ханищтасыг, сав эрнэ тэлат ёл-хассанэн, хурит варсыг.

«Торум Маа» музей кущай нэ Людмила Алфёрова лавыс, Вах я ляпат олнэ мир олупсаныл ань ханты мир учёный нэквен Наталья Ивановна Величко ханищтаве. Тащинк, «От экспедиции к экспозиции» тэла элаль мины.

«По следам этнографической экспедиции по реке Вах» выставкат сав пес пормасыт, маснутыт, савсыр хурит суссылтавет. Ты суссылтап «Торум Маа» музейт сукыр этпос сыс рупитанкве паты.

Людмила Гурьева потре маньщи латныг Светлана РОМБАНДЕЕВА



### Сосса миранув блупса пумщалаве



Хурит С. Кечимов ос Д. Покачев послым олэг

🖊 егион ўст вбртур этпос 20-22 хōталанэт «Хатлые» («Хōталакве») хонтхатыглап олыс. Ты тал муй махум тув Россия янытыл 30 арыгтем ўсытныл ёхталасыт, товат Германияныл ос Казахстан маныл олсыт.

Овыл латын Мегион ўс кущай пентсыл рупитан хум Игорь Алчинов, Экоцентр тармыл пунктотнэ хотпа Руслана Галив ос «Торум Maa» музей кӯщай нэ Людмила Алфёрова тан лавсыт.

Акван-атхатам махум нупыл Игорь Алчинов тох потыртас:

– Ман сака ёмас маквёт олэв. Юграт сав мир акв ляпат юртыныщ олэгыт. Тыт ма-вой нохвиве тёпыл, сосса мир танти пес йис олупсаныл ўргалым оньщияныл, щань латныл потыртэгыт. «Хатлые» хонтхатыглап сака яныг парыс тоты, сав тал тыт сосса мир ос тан руманыл акван-атхатыглэгыт, эргегыт, ййквегыт. Тынакт тыг «Россия-Культура» телеканалт рупитан хотпат ёхтысыт,



Катыл щаквщин ханты нэг

тан тах сосса махманув телевизор хосыт суссылтыяныл. Пуссын пустагыл ōлэн, сав эрнэ тэла варен.

#### Руслана Галив лавыс:

– Сав хотпатын ам пўмащипа латың лавегум, мӯй махумн, эргын нэкветын ос хум хотпатын. Ты мат ёмас номтыл ёмыгтэн, сосса мирыт олупсаныл урыл потрыт ос пёс йис эргыт хунтлэн, тувыл ты овылтыт няврамытын, маньлат хотпатын потыртэн. Сосса махманув культураныл элаль сав тал вос олы, ма янытыл *ОЛНЭ МИРН ВОС ВАВЕ.* 

варнэ магыс, тэн касыньемт сав рупитэг, сосса махманув ёт потрамег, маныр эри варункве, ос маныр ат таи, пуссын тара-паттэг.

Та хоталыт сыс **«Югра** диалог поколений» нампа V научно-практический конференция рупитас, ты тал тематэ тамле олыс: **«Живая** культура Югры».

**Уй ййквнэ вармаль** ōлыс, мāхум тӯлыглахтасыт. Народный мастер России, пёс эргыт, тулыглапыт ванэ ханты хум Яков Тарлин лавыс, эрганылт Пупапщив янытлыя-



Сымың латың Людмила Алфёрова лавыс, тав ты тэла варыглан махум ос янытласанэ:

– Xōтпа хунь мире пēc *олупса урыл потырты*, маньлат махум ханищтыянэ, тан ань латнаныл вос ваганыл, пёс вармаляныл ул вос ёрувлыяныл, тав сака эрнэ тэла вари. Ос хунь сав хотпа акв тэла варев, тонт ман ущпылнэг таксарыг ёмтэв, тэлав ёмас щирыл мины.Мегион *vc кvщайн, Олег Дейнека,* ос Руслана Галив нэквён ам пўмащипа латын лавёгум. Ты хонтхатыглап

ныл. Саснёлыт масэгыт, тох тўлыглахтэгыт. Русскинская павылт олнэ хумыг Данил Николаевич Покачев ос Сергей Васильевич Кечимов ханты эргыт

Ты тал махум хотыт щёс ты атхатыгласыт, сосса мир ос муй махум халт сав учёныит, этнографыт ос пёс блупса ханищтан нэт ос хум хотпат олсыт.

> Надежда Вах потре маньщи латныг Светлана РОМБАНДЕЕВА

толмащластэ



### Маньлат хотпат пес катпосыт



Ольга Александровна Фомичёва Хотал ляльт пойкщи

ан хосат тагыл «Земля предков» нампа музейт рупитан хотпат ёт вайхатэв. Тан музеяныл Екатеринбург усныл 36 вёрыстат, Щитовский я ватат олы. Тот Алексей Викторович Слепухин ос Наталья Юрьевна Бердюгина кущайлахтэг. Тэн «Команда Искателей Приключений» нампа туристыт яласан лёнхыт щёпитасыг ос та сыс лусум маньщит олупсаныл урыл махумн потыртэг.

Вортур этпос юи-овыл хōталанэт тэн **«Наследие** древних людей глазами современных творцов» намаим акв пумыщ ханищтап варыгласыг ос сав маныл махум муйлуңкве вовиньталсыг. Тамле тэла молты тал овыл щёс варыглавес. Тонт акванатхатам маньлат махумн йис порат послым катпосыт суссылтавесыт, аквтох сыре-сыр щуртмилыт ханищтасыт ос тувыл янктор тармыл танки сыресыр посыт щуртсыт.

Яныг хотпат хуньт танки олнэ мананыл ляпат нёрыт халт йис катпосыт касаласыт. Ос тананыл ёмщакв ханищтан магыс «Культурное просвещение» нампа Сверд-

ловский область палыл общественный кол кина щёпитас. Ань та мат «Земной пояс» нампа послым кина махумн суссылтасыт. Ты накт тан «Уральские писаницы:

Минсалим Тимергазеев ос Ирина Вишнякова щаквщёг

путешествие по реке Реж» кина щёпитэгыт тах, мот мат хонтум посыт суссылтэгыт ос юиовылт ты ханищтап урыл потыртэгыт.

Ань акв ўщлахтын хоталт махум щёмьян тагыл, нас маньлат хотпат «Земля предков» музейн ёхталасыт ос хотал палыт тот матыр-ати пўмщаласыт. Овлэт пуссын муй махум ёт Алексей Слепухин пащалахтас, тананылн щёпитан касыл урыл потыртас ос жюри хотпат ёт вайхатас. Тувыл пуссын, ман округувныл

Урай ўсныл ёхталам хонтан маньщи нэ Ольга Фомичёва ёт, Хотал нохнэглын ёр нупыл пойкщасыт. Тав сос косамтас ос «Алпыл сэрипос» эрыг эргыс. Та юи-палт муй махум лакква-уртхатым касункве та овылтахтасыт.

Акв палэт мань няврамыт ос товат щанянылащаныл ёт йис пос хольт танки номылматам хурит послысыт. Мот палэт маньлат хотпат яныг тор тармыл «граффити» щирыл савсыр хурит послункве патсыт. Ос тан халанылт УрФО сав маныл ёхтум мащтыр хотпат пасананыл ўнттувесыт ос тан тот матыр-ати щаквщисыт.

Тобольск ўсныл Минсалим Валиахметович Тимергазеев ос экватэ Ирина Владимировна Вишнякова ёхталасыг. Тэн лувныл сувенирыт варункве махум ханищтасанэн. Ракытныл пормасыт варункве тан Елена Валерьевна Чернавскаян, Владимир Александрович Самойловын, Светлана Валерьевна Масликован ос Нина Фёдоровна Бурганован хаништавёсыт.

Югра маныл кит мащтыр хōтпаг Анатолий Васильевич Вадичупов ос Анатолий Николаевич Брусницин вовиньталвесыг. Анатолий Вадичупов ййвныл варум шахматыт ос сыре-сыр головоломка-ёнгынутыт тув тотыглас. Ам сусмумт, та ёнгыт пумщалан хотпат маткем тот та капыртасыт. Лавегыт, тамле амщит хот ищхйпын лопсыт хансым вос олнувыт. Анатолий тананылн лавыс, тох ат рови, касын хотпа такви вос номсахты.

16.09.2021



### послысыт



Анастасия ос Наталья пумщалахтэг

Тувыл кит āгииг Анастасия ос Наталья ты касыл урыл китыгласагум, тэн потыртасыг: «Мēн Екатеринбург ўсныл тыг ёхтысамён, тот маньлат архитекторыт акван-атхатнэ клубын ялантымён. Тыт юртанув ёт акв колнак хумус йис порат олум элумхолас āлпыл нōх-квāлы oc хотал палыт маныр вари, тамле хурил послыслув.

Манавн тыт сака пўмыщ, олупсат олыглам това накыт аквтуп хащталыг олэгыт, тыт ань тананыл ёмщакв тарапаттыянўв. Ань ваглўв, хумус рактыл матыр пощгаве, аканит юнтавет, лувныл ман ййвныл пўмыщ ёнгынутыт варавет.

Тыт щёс арыгкем ты ўнлымён, пўмыщ головоломка ханьщункве ат вёрмиламён. Тахольт

Анна нётнэ хури послыс

луима мирыт пёс наканыл ат ёрувлыяныл, нохвормалтыяныл, манавн суссылтэгыт ос ханищтэ-ГЫТ.



Анатолий Вадичипув махум ханищты

Тувыл тыт таи ёмас, агмың-мосың, сакватахтам хотпат ос тыг тотыглавет. Тāн аквтох пōслэгыт, матыр-ати варункве ханищтавет. Ман тыт рупитан хотпатн яныг пумащипа латын лавев ос тыг тамле ханищтапын ёхталанкве патэв».

Ты музейт ань агмынмосын, сакватахтам хотпат магсыл янас упорнаколнак ўнттувес, агит та кол хурил послысаныл. Това щемьят тамле нявраманыл ос тыг тотыглыяныл. Тананылн тыт пумыщ, вор мат олнэныл сыс бвыл щёс салыт касалэгыт, маньщи махум рыт хўнтлэгыт. Тувыл музейт хурум лунт,

Кузнецова салыт послум, Настя Корниченко йис пора олимпиада касыл послыстэ. Мот каснэ няврамыт ос янытлавесыт. касың аги ман пыг послум хуриянылт пумыщ йис накыт ощсыт. Тувыл Голубевыт, Пономарёвыт, Токаревыт щёмьят пуссын мўйлупсал майвёсыт.

Мот ёхталам маньлат пыгыт ос акв аги «граффити» щирыл йильпи хурит послысыт. Тан ётаныл «Урал Культур» лапкан кущай хум Алексей Малахов ос музейныл Игорь Гарбузов рупитасыт. Тот бвыл местал Данил Убиенных майвес, тав элумхолас ма-вит юртыныщ блнэ щирыл хури послыс. Китыт мес-



Няврамыт послэгыт

кит ампыг, катит, Рома козёл, сэмыл ўринэква <u> </u>
олэгыт. Тананыл пуссын тыттункве ос тан ётаныл послахтункве рови. Таквсы Екатеринбург ман Верхняя Пышма ўсыгт олнэ щёмьят тув мань яплакат тотэгыт. Салытн, насати, такем товтащла-

Ань няврамыт касылыт палт Лада Максимова пунктотыс, тэн Н.Ю. Бердюгина ёт пуссын хурит суссанэн. Щар маньнув агирищит-пыгрищит халт Дима Ильясов «Моя жизнь, моё племя» послум хуритэ магыс эсгувес. Мот рупатат халт Марина

тал Егор ос Евгений Прохоровыг наманэн лаввесыг. Тэн йис пора олупса йильпи щирыл послум хурит суссылтасыг. Хурмит места Анна Бахирева ос Богдан Бархатдинов халэнт уртыстэн. Аги послум утэ «Нейвинская история» намаим олыс, пыг пёс олупса комиксыт хольт послыстэ.

Яныг янкторыт тармыл послым хурит ань музейт хультэгыт. Тув ёхталан муй махумн вос сунсавет, пумщалавет тах. Ман сав тэлат тот тара-паттысув, ты урыл мот щёс ин хан-СЭ̄В.

Тамара МЕРОВА



### Округ сосса махманув яныг мӯйлупса катын-паттысыт

осква ўст «Сокольники» мат нёлолов хоталныл ос титхуйплов щисла мус «Сокровища Севера» нампа выставка блыс. Ман округувныл сав махум тув ялсыт, пуссын аквъёт атпан хотпа. Ты «Ланки», «Кама», «Ильбигорская» община хотпат, мащтырыг юнсхатнэ ос ёрыгхатнэ нэтхумыт, культура ос искусстват рупитан махум танти варум пормасаныл тув тотыгласаныл.

Российский Федерация янытыл Луимат, Сибирьт ос Дальний Востокт мощщаг хультум налыман савсыр мирыт олэгыт, тан пуссын танти латныл потыртэгыт ос танти <u> </u>ощнэ маснутыл масхатэгыт. Касың танти олнэ мāнылт пēс щирыл вōрт ўйхул алыщлэгыт, ят хул пувёгыт, пил ватэгыт, товат щарщит уйигтан ўйхул катын-паттэгыт ос салы оньщегыт. Сосса махум культураныл мот мирытын пумщалаве ос ханищтаве.

«Сокольники» кант юв-щалтнэ мат «Торум Маа» музейт рупитан махум тит ёрнколыг тущталасыт, ёрнкол тивырт ощнэ пормасыт лакквапинтласыт ос тот савсыр

тэнут пайтсыт, муй махум атың хул исмитыл айтсаныл. Тот рупитаманыл сыс нянь варсыт, щёпыр нёвыль исмит пайтыгласыт, сўйпилыл, санквлыпилыл махум тыттысаныл. Товат лавегыт, нэмхуньт тамле атың пил ат тэщинтасыт.

Югра мав урыл потыртаманыл порат ищхипын ут хосыт ман округув суссылтавес, хот ман палтув муйлункве рови, хоты манув муй хотпа магыс пумщиг олэгыт, хумус сāлың мāхум тāнти пёс йис манылт олэгыт. Ос акв эрнэ проект ман палтув рупиты – ты ITстойбище, салын ханты махум олнэ манылт интернетыл варвесыт, тан ань ворт олым ищхипын ут хосыт хоталь-ати пищма



хансункве вёрмёгыт.

Выставкат савсыр конкурсыт варыглавесыт, махум муй хотпат элыпалт танти юнтум маснутаныл, катыл варум пормасаныл суссылтасыт. Выставка рупитам порат фестивалиг варыглавесыг, ты **«Кочевье Севера»** ос «Полярный стиль». Тувыл конкурсыт ос олсыт, ты «Лучшая региональная экспозиция выставки», «Лучшее изделие национальных художественных промыслов» ос хурит послын конкурс «Северный взор».

Тув ёхталам махум мащтыр хотпатныл катыл матыр варункве ханищтахтасыт, титыглахтасыт,

хумус тыи манос мот пормас вараве. Мащтыр махум халанылт ос ханищтахтасыт. Тот Луиманыл тотым савсыр пормас, маснут, тэнут ёвтункве ровыс. Нэт сасныл варум пормасаныл тыналасыт, хумыт ос ййвныл савсыр ёнгынутыт ёргысыт. Щаквщин хотпа хунь пормасанэ суссылтавет ос ёвтавет, тавён ты коныпал матыр варункве пумщиг емты, тав ты рупататэн касыңыщ вуйхаты.

Юи-бвыл хоталт сукыр этпос титхуйплов щислат нох-патум махум наманыл та лаввесыт. Гран-При «Лучшая региональная экспозиция» щар яныг











муйлупса нётнэ ос пумыщ выставка магсыл ман Югра мав майвес, тув ялум махманув татем та щагтсыт, ваим, тан тасавит пормас суссылтанкве тув тотыгласыт.

Зоя Никоновна Тарлина састотапанэ магсыл ōвыл места, хӯл совныл юнтум хурыгсованэ матсыл титыт места ос совныл юнтум тучананэ матсыл «Специальный приз» нэпакытыл майвес. Мария Ивановна Игишева хорамын суп, торсахи магсыл овыл места вис. «Специальный приз» нампа муйлупсал Анатолий Александрович Каюков, Нефтеюганск ўсныл олнэ хум ййвныл ёргум пормасанэ магсыл янытлавес ос Лидия Александровна Алясова аканит матсыл акв тамле муйлупса нэпакыл майвес.

«Лучшее произведение национального народного искусства» нампа номинацият **Вячеслав** 

Юрьевич Кондин, Надежда Александровна Коновалова («Торум Маа» музейныл), Яков Никифорович Тарлин Касум павылныл, Жанна Александровна Хохлянкина Корлики павылныл, Альбина Лазаревна Ярсомова Угут павылныл, Наталья Васильевна Маковецкая Ханты-Мансийск ўсныл, Екатерина Леонидовна Молданова Касум павылныл янытлавёсыт.

«Торум Маа» музей «Национальное жилище» номинацият овыл местал майвес. Неля Валерьевна Низамова ос Светлана Сергеевна Шайгарданова, музейт рупитан нэг, ёрнколт савсыр тэнут варсыг, ты магсыл тэн «Национальная кухня» номинацият титыт местал майвесыг.

«Кочевье Севера» эргыт ос ййквыт суссылтан фестивальт «Мощ хот» (Мойт кол) нампа Кышик павылныл олнэ ансамбль







титыт места висыт, ты няврамыт Светлана Александровна Хатова ханищтыянэ.

Тув ялманыл урыл ам Вячеслав Кондин титыгласлум, тав тох потыртас: «Ам ты элы-пал талытт ты выставкан ос яланталсум, тот мот мирыт варум пормасаныл сунсыгланкве сака пумыщ, товат тот ўнлахолым матыр щаквщёгыт, тув ёмантэгын, сунсэгын, хот ат торгамтылын, аквты мащтыр хотпа титыглылын. Рови тав ётэ *ўнтункве ос тав нупылэ* сунсым варункве. Ам ос няврамыт магыс ййвныл ларгын утыт ёргēгум, «сāт лув» нампа номтыл каснэ ёнгынут, мāнь касайсупыт сыпалин тагыл варегум, тамле пормасанум молях ёвтасавет.

Нэ хотпат сасныл сав-

сыр састотапыт, совтыт, пайпыт юнтэгыт, хорамыл щуртыяныл. Тот махум сав ёхталы, аквтыщёс ёвтавет. Москват тамле ут хунь ващинтэгыт.

Ман тот олум ущлахтын хоталувт Москва ус намхоталэ олыс, сака сав мир ус янытыл муйлым ёмыгтасыт, ман выставкавн ос ёхталасыт. Катыл варум сав пормастув тотыгласув, таимагыс округув нох та патыс. Тыи магыс ман сака щагтсув».

Ань Югра мав ос хантыт, маньщит сав мирн вавет, манхурип мащтыр хотпат тыт олэгыт. «Сокровища Севера» суссылтап касын тал варыглаве, мотыт талн махманув ос ёмщакв вос щёпитахтэгыт, тал сыс вос щаквщёгыт.

Галина КОНДИНА

www.khanty-yasang.ru



### Маньщи мат наманы<mark>л</mark> нэпакн хансыс

Ты тал ойттур этпос нёлолов хоталэт Александр Константинович Матвеев 95 талэ товлынув. Ты учёный хотпа олмет Урал ма янытэт яласастэ, тав тот олнэ мирыт ёт вайхатас ос ят, турыт, нёрыт ман урыт наманыл пуссын тара-паттысанэ ос нэпакн хассанэ. Ойка аквтох лусум маньщит палт рупитым ялантас, та поратэ ань хурит послым хультыс ос дневник-нэпакет хансым олы.

А.К. Матвеев намхоталэт касталан магыс «Земля предков» историко-этнографический музейт рупитан хотпагн, Алексей Викторович Слепухин ос Наталья Юрьевна Бердюгина, суссылтап щёпитанкве номылтасыг. Тэнатэн Татьяна Николаевна Дмитриева нётыс, тав Екатеринбург уст Уральский университетт рущман мотлатныт ханищтан кафедрат рупиты.

Нэ Матвеев ойка ёт ёмщакв вайхатым олыс, аквъёт лусум маньщит палтялсыг, остонт Татьяна Николаевна сав хурит послыс. 2006 талт Татьяна Дмитриева доктор нам диссертациятэ хасме порат Александр Матвеев тав рупататэ тармыл пунктотыс.

Мāн ань вортур этпос ват нупыл онтолов хоталэт та музейт олмув сыс, А.К. Матвеев овылтыт щёпитан суссылтап сунсункве вовиньталвесув. Ойка олупсатэ урыл манавн Татьяна Дмитриева потыртас. Овлэт тав 1949 талт рущ латын ос литература ханищтан хотпаг Хабаровский уст олнэ интитут астлас ос тувыл Уральский государственный университетт элаль ханищтахтас.

Тот «топонимика» наукал пўмщалахтункве патыс, савсыр мирыт латнаныл палт «ономастика ос этимология» тэлат аквтох пўмщалас. Тох финно-угор махум латнаныл хўнтамлас, ты мирыт олнэ павланыл, ўсыт, ят ос тўрыт хумус тан латныл лаввёсыт, пуссын нэпакн хассанэ.

Тувыл тав 40 тал арыгкем Уральский государственный универ-



Татьяна Дмитриева хурит суссылты





Маньщи няврамыт

ситетыт рущ латын ханищтан ос мот латныт тара-паттын кафедраг пунктотнэ хотпаг рупитас. Учёныит А.К. Матвеев урет тох лавегыт, тав Уральский ономастический школа варум хум. Университет палыл тав топонимистический экспедицият щёпиталыс, сав студентыт савсыр мирыт ёт вайхатункве ос олнэ мананыл ханищтанкве тотыглас.

Тан Свердловский область янытэт яласа-саныл. Ты коныпал Пермский, Курганский, Челябинский область това мат ханищтасаныл, ХМАО ос Ямал ман ос ёхталасыт. Ты тал тамле яласан экспедициятн 60 тал товлыс.

Ань ты суссылтапыт махум Александр Матвеев 1968-1971 талытыт лусум маньщит олнэ ман ялантам поратэ урыл потыртасыт. Тонт Татьяна Дмитриева ос тув ялыс, та хольт маньщиянув хурин послысанэ. Та по-

рат маньщиянув ин салыяныл оньщим олсыт. Учёныит тананылныл савсыр эрнэ латныт китыгласыт, карта послысыт, ят, турыт, нёрыт наманыл ёмщакв хултвесыт.

Ты элы-палт маньщиянув палт финн-ойка Артур Каннисто 1901-1906 талытыт ёхталас. Тав тонт маньщи махум **олупсаныл** тара-паттыс ос сав маньщи латныт нэпакн хансыс. Тувыл тав хансум нэпаканэ Вуокко Эйрас ос Арто Моисио, кит учёный хотпагн, элаль ханищтавёсыт ос 2013 талт «Маньщи словарь» таратасыг. Потрыт тот английский латныл хансымат, мот хон махум 30 сотыра маньщи латныт ванкве патэгыт тах.

Уральский университетыт наука картотекан 17 сотыра сыре-сыр маньщи латныт акванатымат. Товат нэмхот хансым ат олэгыт.

Тамара МЕРОВА



### Лопмус павыл колтагыл


аньщи нэг-хумыг Светлана Николаевна ос Валерий Владимирович Хозумовыг Хальўс район Лопмус павылт олэг. Туи Лопмусн ялмум порат, тэн колэн щалтсасум, ўнлахолсўв, потрамасўв. Пёс махманув кастысанув, яныгмам порав номылматыглалыслув.

Тонт павыл махманув пуссын маньщи латныл потыртасыт, оманув маньщи супыл олсыт. Кос хоталь щалтэв – лапкан, почтан манос пульницан, туп манти латнув суйтыс, та мовиньт, та ощхуль, ман тох яныгмасув.

Светлана Николаевна Потрасуй павылт самын патыс. Нан ань элаль тав потре ловиньтэлын.

– Анёквам Хуринова Вера Лопмус нэ олыс. Апщи отвышас, Макщум. Tāн коланыл пāвыл котильт ўнлыс. Омам Матрёна Ивановна Таратова, такви опарищ наме Чукопеликова. Ныюм Александра Ивановна, ойкатэ щирыл Остерова олыс. Омам кит канк оньщас – Илья ос Николай, сас войнан тотыглавесыг. Акиягум юв ат та ёхталасыг, нэматыр латың атим олыс. Ётыл анёквам тэн магсылэн пенсия-олн вуйлас.

Колтаглувт ман хот няврам олсув, ам ань амттем хультсум. Лида увщим нявраманэ ёт ос Ваня канкум пуссын Кульпаст олсыт.



- Кульпаст ханищтахтасум, интернатт олсум. Хунь овыл классын минасум, ман Посалтыт павылт олсув, Потрасуйныл павлув алгаль ўнлы. Номилум, таквсы порат интернатын тотвёсум, туйт патыс, янк ты поли. Сахил ос нярал олсум. Тонт интернатыт сака сав няврам олыс — Саранпавыл, Лопмус, Сортынья ос мот павлытныл ханищтахтункве тотыглавёсыт.

Омам Потрасуй зверофермат рупитас. Павылт маньщи мир сав олыс, лапка, школа олыс. Тувыл звероферма Кульпасн тотвес, ман тув вантлысўв, омав элаль тот рупитас. Ам школа астламум юи-палт, ос зверофермат рўпитасум. Ос трудовой книжканувт ты урыл нэматыр хансым ат олыс. Та нэпаканув рупата колувт нас ощвёсыт, нэматыр тув ат хансыглавес. Ётыл ам рыбоучастокн патхатыгласум, та таланум тай хансыглалвесыт.

Ойкам ёт Кульпаст





Валерий ос Светлана Хозумовыг

акван-хонтхатсумен. Тав Лопмусн танхыс, тыг та йисмен. Анеквам хоса олыс, мань порат тав палтэ тотыглавесум, хунь хум варсум, тыг та олмыгтасум. Мен лув, мис акваг янмалтасмен, пум варсумен. Ань ат оньщимен, пуссын холтсанмен.

Светлана Николаевна ойкатэ Валерий Владимирович Лопмус павыл хум. Тав атятэ Владимир Устинович Хорынпавылныл олыс.

### **Валерий Владимиро- вич** тох потыртас:

– Āтям колтагыл махманэ ётыл Пупйисум павылт олсыт, тав тот яныгмас. Опам Устин Викторович Хозумов яныг хонтын ялыс, юв ёхталас. Атям потырталыс, пукихурге агмын олыс, операциял варыглавес, мощ олыс, атимыг ёмтыс. Ам опам палт ляхтхатасум.

Щащёквам Татьяна Михайловна, такви бпарищ наме Гоголева, Олттумп павылныл олыс. Тонт хум хотпат тувле нупыл хул алыщланкве кетыглавесыт, опам ёт тот акван-хонтхатсыг. Кит пыг янмалтасыг, атям ос Кузьма каңке. Акв пыгён мань порат атимыг ёмтыс. Щащёквам хоса олыс, Пупйисумт ёл-щёпитавес.

#### - Оман хотыл олыс?

– Омам Елена Константиновна Мёсыг павылныл блыс, такви бпарищ наме Юрьева. Павыл махум пуссын Кульпасн тотвёсыт, тав тот яныгмас, тувыл атямн хайталавес. Омагм-атягм хот няврам янмалтасыг, ам щар яныг.

Валерий Владимирович ос Светлана Николаевна лавег, яныгмамен порат, колтагыл махманэн юн акваг маньщи латныл потыртасыт. Ты йис махум ань танти маснутаныл морсыныщ масыглыяныл, маньлат хотпат щань латныл ат потыртэгыт. Лопмус павылт ань Светлана Николаевна тактёт маньщи супыл олы. «Луима сэрипос» газета тэн палтэн ёхталы, ловиньталэг.

Ты ятил маньщи хотпагн ман сав ёмас, сымын лавев. Пус кат, пус лагыл вос олэг, Най-Отыранэн вос ургалавег!

Светлана РОМБАНДЕЕВА



# Нёлпас ос Яныг ўсныл олнэ таксар хум 50 пыганэ (ханты мойт)

Танварп эква кит агияге ёт олы. Агииг татем нётнэг яныгмасыг, сома туяг кит халиг ущ нэглын луптанэн ёт сусхатэг. Эква номсы, ань матумыг ты ёмтыс, агияге хум вос варёг.

Аквматнакт Танварп эква колэ похат тасавит пыгыт атхатасыт. Ты насати Ас я лоңхаль ўнлын Яныг ўсныл олнэ таксар хум 50 пыганэ ёхтумыт. Тан ляпанылт кит пыгыг люляхолэг, нас маснутыл олэг, вораян хумыг. Акватэ наме Нёлпас, мотанэ – Парпаль.

Тыг ёхтум касын пыг Танварп эква нётнэ аги нэгыг винкве танхыстэ. Атхатам пыгыт та ўрхатэгыт, ань хунь эква такви кон-квалы, пўри урыл потыртанкве паты. Ос кон нэмхотьют ат та нэглы.

Нёлпас люлис-люлис, тувыл Парпаль юртэ нупыл лави:

– Эква колн щалтсэн, китыглэлн, манавн маныр лавункве танхи?

Вораян хум ат молямлы, колн щалтыс, ави сунтыт супнелмтал та люляхолы. Танварп эква таве касаластэ, лави:

- Āгиягум наманэн ханьщиянын те, хотты пыгыг палт маньнэг вос минэг. Нэматыр анумн ат эри, хум хотпаг палт нас тох тартыягум.

Парпаль номсахтым хоса люляхолыс, агииг наманэн ханьщункве ат вермысаге.

Кон ань сатапас, пыг кон-квалыс, сунсы, 50 пыгыт танти олнэ мананылн та нёвумтасыт. Тан



юи-паланылт вораян ханты пыгыг паттапахтасыг.

Ты халт ос юн агииг тыгле-тувле та ёмыгтэг, колкан партыт нас щихыртэгыт, тамле та таксар маньлат нэг, оматэн нупыл кантыныщ лавег:

– Пыгыт хунь ваганыл мён намагмён. Тананыл манрыг наскассыг саватыянын. Мёнамён тан ётаныл вайхатанкве эри!

Мотыт хотал Парпаль Нёлпас нупыл лави:

– Тыхотал наң ялэн Танварп эква палт, китыглэлын, манавн маныр лавункве таңхи?

Нёлпас нэмхотталь ат молямлы, Танварп эква колэ ляпан ёхтыс, сунсы, Яныг ўсныл олнэ таксар хум 50 пыганэ ави похат люлегыт. Тав тан тараныл ёмыс, колн та щалтыс.

эри, хум хотпаг палт нас тох тартыягум.

Яныг эква таве туп каса-

ханьщиягын те, хотты

пыгыг палт маньнэг вос

минэг. Нэматыр анумн ат

– Āгиягум наманэн

ластэ, лави:

Āгииг пыг палт нэглысыг, тыгле-тувле та ёмыгтэг, колкан партыт нас щихыртэгыт, тамле та таксар маньлат нэг.

Нёлпас такос номсахтас, āгииг наманэн ханьщункве ат вёрмысаге.

Ань кон ты этимлас, 50 пыгыт танти олнэ мананылн та нёвумтасыт. Тан юи-паланылт вораян ханты пыгыг паттапахтасыг.

Хурмит хотал Нёлпас ос Парпаль халэнт потыртэг:

– Тыхōтал ōс ялымēн Тāнварп эква палт, мēнамēн маныр лāви?

Кол ляпан ёхтэг, 50 пыгыт ави похат люлегыт. Юртхумыг тан тараныл ёмсыг, колн та щалтсыг. Танварп эква кит пыгыг касалас, хащсаге, лави:

– Āгиягум наманэн ханьщиягын те, нэн палтын нэгыг вос минэг. Нэматыр анумн ат эри, нэн палтын нас тох тартыягум.

Пыгыг ависунтыт супнелмтал та люлег. Тувыл Танварп эква такыщ та роңхувлас:

- Ам кёлпум - ам алпим, ам нётнэ агитёгум вораян маньлат хумн, Нёлпасын, элы ман та тотавёг!

Тох потыртаме юипалт, яныг агитэ Нёлпас пыгын лавыстэ, мань агитэ – Парпаль палт ўнттыстэ.

Тувыл эква кон-квалыс, пыгыт нупыл лавыс, ань агияге та хайталавесыг, ёмас хум хонтсыг. Ас я лонхаль ўнлын Яныг ўсныл олнэ таксар хум 50 пыганэ нэ кинсункве мот ман та нёвумтасыт.

Нёлпас таксар ос мўсхал хотпаг олме магыс, нэ хонтыс, Парпальюртэн нэ тотункве ос нётыс. Тан ань тыхотал мус ман ляпавт олэгытхўлэгыт.

Ты нэт-хумит похат юнтуп вущкасанкве те, таве та мат хонтылын. Та мус та сымын, вещкат махум, мот хотпа пормасын ат новхатэгыт.

Владимир Енов хансум мойтэ маньщи латныг Светлана РОМБАНДЕЕВА

толмащластэ



### Мутран элумхолас кастыглан магыс



Татьяна Дмитриевна Слинкина

Апьщи хум Никита Партанов тованакт рущ газетан потрыт щёпиты, тувыл тананыл ман палтув кетыянэ ос маньщи латныл хансункве лавиянэ. Молал акватэ Е.И. Ромбандеева урыл олыс, мотыт щёс Т.Д. Слинкина маньщи мутрат урыл китыгламе ос тав ювле лавум латнанэ щирыл потыр хансыс. Рущ латныл хансым потрыг «Жизнь Югры» Хальус районный газетат ловиньтанкве вёрмегын.

Ты тал вортур этпос 28 хоталэт Татьяна Слинкина атимыг емтуме пасыл талэ товлыс. Эква ань тыг мус махумн кастыглалаве, тав урет венгрыт ёмас латын лавегыт, пес накыт, топо-

нимика ос ономастика тэлат ханищтан учёныитн сака янытлаве. Тав 2011 талт «Мансийские оронимы Урала» хансум нэпаке сав хотпатн пумщалаве. Ман таве ос кастылув, ань маньщи

мир, олупсаныл овылтыт маныр номсыс, нанан потыртэв.

«Маньщи хотпа – маньщииг олнэ сайтэ акваг номитэ», – ты Татьяна Дмитриева Слинкина лавум латне. Тав мань тагыл Анна Ивановна Номина оматэн ос Мария Дмитриевна Ромбандеева анёкватэн янмалтавес. Тэн латнён акваг хунтлыс, маньщи латын ос йис потрыт ванэ агииг яныгмас.

### Мань няврамыт хумус янмалтавесыт

– Ань «рущ» пора ёхтыс. Ман яныгмамув порат, нэмхуньт няврам нупыл щахны ат такталавес. Амп тав тыпыл латын хўнтамлас... Маньщит танки нявраманыл ёмас латныл янмалтасаныл. Маныр лавегыт – няврамакве пуссын торгамты. Матыр люль вари ке, такыщ латын лавегын, тувыл та. Нэмхотьютн ат ратвес, паляге ат хасумталавег. Юныгтан кат агмыңыг ёмты. Няврамакве таквирот хот-ати хайтыгты, панканэ ловумтавет, ёл та хуюптаве. Маньщит тох та олэгыт.

#### **Āт** урыл

- Ам маньщи саг ощсум. Агирищ туп яныгми, тав сагыл сагвес. Туп школан минамум порат атанум хот-яктапавесыт. Олмувт, агирищит саганыл нэмхотьютн ат хасумталвесыт. Маньщи сагыг – ялпыныг ловиньтахтэг, таимагыс тув ат новхатасыт. Ты рущит тан мори капыртасыт.

#### Ялпын хоталыт овылтыт

– Маньщит акваг рўпитым олсыт: туи лёмвой сав - ос махманув пум сагрегыт, пум сапри репёгыт, тэлы ащирмат пуманыл юв тотыяныл, найив сартэгыт, вит тотэгыт. Хум хотпат ворт, ят, хара мат акваг яласасыт. Ялпың хоталт муйлуңкве пора āтим ōлыс. Туп щāй аюнкве хотталь атхатыгласыт, аквъёт ялпың ман ялсыт... Уй ййквнэ порат акван-хонтхатыгласыт ке, тувыл та. Ўринэква ялпын хотал ат номегум, нэмхуньт ат варыглавес. Ань йильпи порат ущты мӯйлункве квалтапаптувес.

Тувыл Татьяна Дмитриевна такви щёмьятэ урыл потыртас. Тэн ойкатэнтыл акван-хонтхатмен порат, Урай ўсн вантлысыг. Тот аги ос пыг янмалтасыг, Надежда Урайт леккар нэг рўпиты, Александр ос Октябрьский район ялпынколн патхатас.

Фёдор ойкатэ урыл лавыс:

«Ойкам рущ-маньщииг олы (мовиньты). Тан овлэт Иртыш я хосыт хот олсыт, тувыл рущ махум ёт акван-тэлыгтахтасыт. Тованакт тав нуплэ сунсым, ёмтулэт ос вильтэт щар маньщииг сусхаты. Ань касын маньщи, кос матыр вари, акваг номитэ – тав маньщи хотпа».

#### Тамара МЕРОВА

#### Лўима сэрипос

(Северная заря) №18 (1252), 16.09.2021 Соучредители Дума, Правительство

дума, правительство Ханты-Мансийского автономного округа – Югры Издатель

Департамент общественных и внешних связей Ханты-Мансийского автономного округа – Югры

#### Редакция

Врио директора, гл.редактор - **Кондина Г.Р.** Телефон (3467) 33-36-82

Заместитель гл. редактора — **Кондина Г.Р.** Телефон (3467) 33-36-82

Ответственный секретарь – **Узель В.В.** Телефон (3467) 33-23-09

### Адрес редакции и издателя: 628011, г.Ханты-Мансийск, ул.Комсомольская, 31 тел./факс (3467) 33-17-52

E-mail:gazeta@khanty-yasang.ru Газета размещена на сайте www.khanty-yasang.ru

#### Отпечатано:

ООО «Новости Югры-Производство» г. Сургут, ул. Маяковского, д. 14.

#### Индексы **04399**, **54399** Тираж **1710** экз. Заказ **4000** Цена свободная

Мнение авторов публикаций не обязательно отражает точку зрения редакции.

Газета зарегистрирована Управлением Федеральной службы по надзору в сфере связи, информационных технологий и массовых коммуникаций по Тюменской области, XMAO-Югре и ЯНАО.

Свидетельство о регистрации ПИ №ТУ 72-00795 от 23 января 2013 г.



# **Ойка хурит послы ос щаквщи**



Константин Анатольевич Резидент

максим Горький тамле латын лавыс: «Катыл хурит послын хотпа – олнэ ма, тав паляге, самаге ос сыме щирыл ваве, тав олум нотэ хурит послы».

Ань Константин Анатольевич Резидент хурит послын ойка хуриянэ ос ййвныл ман лувныл щаквщин пормасанэ суснэ порат, ты вармалит ман тара-паттыянув. Тав сака ёмас элумхолас, послункве нётнэг хасы, округувт тав Хальус павылт олы.

К.А. Резидент мань таквсы этпос онтолов хоталт Винница уст (Украина ма) самын патыс. Тав

Салехард ўст культура ос искусство училище астлас. Хальўсн 1981 талт ёхтыс. Овлэт Хальўс хўлыт тэнутыг варнэ колт рўпитас, тувыл промкомбинатыт сувенирный цехыт пунктотнэ хотпаг олыс.

Ётыл 1988 талт культура районный отделт катыл хурит послын хотпаг паттувес. Ос «Берёзовский районный Дом культуры» колт 1996 тал пасныл рупитанкве патыс, тот художник-декораторыг олыс. Ты рупататэ сака эруптастэ, ёмасыг ос сымыныщ варыстэ. Дом культуры колт щёпитан ялпын хоталыт тав талэ ат варыглавет.

Константин Анатольевич Эргынййквнэ колнакыт ос суссылтапыт акваг мащтырыг хорамтыянэ. Тот ййвныл ман лувныл варим пормасытыл хорамты, живопись ман графика щирыл хурит тув послы. Ойка послум нётнэ хуриянэ Хальўс районт, Юграт олнэ махум коныпал Екатеринбург ос Тюмень ўст вавет.

2009 талт туяг Хальус йис пормасыт акван-атнэ музейт тав «Пейзажные мотивы» нампа суссылтап щёпиталыс. Ос 2018 талт аквта музейт «Жил-был художник» нампа послум хуриянэ суссылтас.

Тав послум хуриянэт махум нётнэ ма-витув касаласыт, луима сака эруптым послыстэ. Тувыл ййвныл ос лувныл щаквщим пормасыт, живопись ос графика послын утанэт луима олупсав щар ёмщакв нанки.

Константин Анатольевич сака нёмса элумхолас, такви рупататэ урыл лави: «Ам хуриянум ёмас номт ощнэм порат вариянум, таимагыс



Йӣвныл варум хуриянэ

тан тох сусхатэгыт». 2001 талт тав Хальўс район палыл почётный грамотал майлувес, мот янытлан нэпакыт ос оньщи. 2008 талт округ ярмаркан пормасыт суссылтан ос тыналан магыс ёхталас. Това хуриянэ 2009 талт Москват олыглам суссылтапын тотыгласанэ. Тувыл 2018 талт Хальўс 425 талэ товлуме кастыл «Город мастеров» нампа фестивалит рўпитас.

**Марина Табун** кётум потре маньщи латныл **Тамара МЕРОВА** хансыстэ





